

德清縣新志卷十

藝文志 一碑刻

學碑

重修孔子廟碑

宋紹興間邑人沈與求撰記（文見龜溪集）

重修儒學碑

明隆慶元年吏部清吏司主事邑人許孚遠撰記賜同進士出身承事郎大理寺評事邑人潘銓書丹

德清縣修文廟碑

明嘉靖六年福建按察司副使奉敕視學仁和邵銳撰記吳江書丹

重修儒學碑

明章嘉禎為邑令熊德陽撰記

德清縣重修儒學碑

清康熙二十五年湖州府知府古燕人王階撰記

重修德清縣學宮碑

清雍正十三年廣西學政邑人徐以升撰記刑部貴州司主事許鎮書（文附）

重建大成殿碑

清道光二十四年內閣侍讀學士邑人蔡廣颺撰記賜同進士出身廣西即用知縣沈雲書（文附）

重建德清縣儒學碑

清光緒二十四年前翰林院編修邑人俞樾撰記賜進士及第翰林院編修國史館協修俞陞雲書丹（文附）

德清縣科第題名碑

明嘉靖乙未年刑科給事中邑人陳霆撰記知德清縣事謝九儀立國子生談崇文書丹

德清縣新志

卷十 藝文

德清縣儒學馬師尊兆科紀略

明崇禎戊辰年許大受撰文

學師曹公祀田碑

清乾隆三十五年邑庠生沈毓洙撰記（文附）

清溪書院碑

清乾隆十八年徐以升撰記邑庠生許昇元書（文附）

仙潭書院碑

清光緒二十六年俞樾撰記拔貢生夏際唐書丹（文附）

署碑

重修察院碑

清康熙二十五年邑令山西王廷詒撰記（文附）

重建德清縣署碑

清光緒三年合肥縣令譚廷獻撰記邑令支恆椿立（文附）

祠碑

名宦鄉賢祠碑

續侯志曾用撰記（文附）

重建忠義孝弟貞節祠碑

清光緒十二年知縣崇明童叶庚撰記知縣長洲吳念椿書（文附）

橋碑

重建德清縣富甯橋碑

清邑令錢學洙撰記翰林院編修邑人徐以升書丹雍正九年孟冬立（文附）

重建阜安橋碑 清邑令湖南廖宗元撰記武康拔貢生林鏡書丹（文附）

重建唐棲長橋碑 明華亭錢福撰記宏治十一年冬十月化主鄞縣陳守清立

重修唐棲通濟長橋碑 明湖州蔣瑤撰記嘉靖十四年春正月勒石

唐棲鎮通濟橋碑 明邑人陳霆撰記嘉靖庚子夏四月朔立

重建大麻望仙橋碑 清總督程元章撰記（文附）

重建白雲橋碑 清邑人俞樾撰記（文附）

重建四仙橋記 清邑人俞樾撰記光緒二十六年冬十月立

### 寺廟碑

重建關帝廟碑 清知縣翼城王廷諫撰記康熙二十七年孟秋中浣立

德清縣關岳廟碑 民國知事湘潭袁思古撰記十四年立

重建城隍廟碑 清邑人徐倬撰記翰林浣修撰蔡升元書丹康熙十七年戊辰黃鐘月立

浙江湖州府德清縣城隍廟碑 清翰林院修撰吳縣石韞玉撰記嘉慶二十四年仲夏立

## 德清縣新志

卷十 藝文

二

重建德清城隍廟碑 清邑人俞樾撰記刑部江西司郎中里人戚人銑書丹光緒十五年仲春立（文附）

重修餘不亭侯廟碑 清徐秉愿撰記原任江西長寧縣巡檢里人徐開德書嘉慶三年夏五月立（文附）

重修顯佑廟神碑 明邑人蔡中孚撰記正德十五年春二月立

重建保濟顯佑侯廟碑 清知縣錢學洙撰記（文附）

大宋湖州府德清縣新市鎮新建東嶽行宮碑 宋姚穀撰記紹興四年春三月立

重修新市鎮永靈東廟碑 明胡璫撰記正德年立

重修永靈東廟碑 明陳尙古撰記（文載新市鎮續志）

重建永靈東廟碑 清邑人俞樾撰記楚南周溧書里人孫濬銜同治十一年秋七月立（文附）

尚書省隸湖州德清縣惠侯廟陸載碑 禮部原文碑樹新塘神廟內

重修祐聖觀碑 明吏部稽勳司主事邑人許松撰記金陵逸士沈奎書萬曆丙子仲冬立

重修真武祠碑 明邑人陳霆撰記古姚夏瓚刻石

重建開元宮玉皇殿碑 清邑人蔡之定撰記嘉慶二十四年嘉平之望書立

重建吳羌山高士菴碑 清舉人邑人沈芬撰記庚午冬落成

重建慧通講寺碑 明衛府長史三衢金實撰記永樂二十一年春正月既望立石（文載新市鎮志）

重建覺海寺大士殿碑 清翰林院編修邑人徐璋撰文乾隆二十五年夏落成

重修顯親寺碑 明浙江等處承宣布政使司左布政使東魯劉汝康撰記前刑工二部郎中邑人胡爾慥書丹庠生沈飛刻石萬歷乙卯仲春二月冠帶住持僧大欽立

重建大善寺碑 明卓明卿撰記（文載唐棲鎮志）

緣善庵碑 清邑人姜銑撰記雍正年落成（文載新市鎮志）

溪秀壇碑 清生員蔡燮金撰記朱黻書并鐫光緒十九年仲夏立

重建慈相寺冷然閣碑 民國臨海朱焯撰文沈隱蓮書十二年立

綠瓢寺鶴居碑 民國知事固始吳翥撰記七年樹瓜山

善堂碑

德清重建留嬰堂碑 清邑人俞樾撰記（文附）

德清縣新市鎮育嬰堂碑 清邑令德化唐煦春撰記石門吳鏗書鐫光緒元年四月立（文附）

德清縣新志

卷十 藝文

德清縣義倉碑 明戶部尚書兼武英殿大學士永嘉黃淮撰記浙江等處提刑按察使司副使王預書並篆額（文附）

雜碑

永禁凡遇拏獲越界販鹽祇就本地處分毋許株連商店碑 清兩浙鹽運使張告示德清縣商人王衡

等於嘉慶八年十一月立

勒石永禁藥魚碑 清邑令張告示光緒二十二年立於餘不亭候祠內右側（文附）

謹遵減浮章程徵收田賦銀錢數目碑 清邑令林告示宣統三年五月立（文附）

附文

重修德清縣學宮記

徐以升 階五

古者化民成俗建學爲先凡以崇師儒肅瞻仰而釋奠釋菜習樂習舞咸於是乎觀禮誠鉅典也我國家文教誕敷振興學校上以妥先聖賢之神靈而下以動士庶人之向化隆恩異數卓越古今辱在臣工敢不鼓舞恪恭以襄盛典郡伯唐公芸閣清風絃歌雅化留心文治加意膠庠遵奉憲意各屬修葺學宮而

吾邑錢侯以幹濟之才率作興事孜孜不倦爰經始於辛亥之冬落成於癸丑之春炳蔚輝煌甲於浙郡邑中父老以及四方來觀者罔不咨嗟歎賞謂爲數十年來所未覩而吳興七邑之所首創猗與盛哉夫事之難也莫難於實心任事之人又難於同心輔事之人勝朝以迄國初往往頻修頻圯外粉飾而中朽蠹費徒冗而功不全良由司其事者不過塗民耳目聊且畢事已爾今我錢侯創作務期乎堅久巨細必赴以完神暨兩學廣文三四條佐齊心協力一切經營量度咸稟受邑侯方略靡弗曲當而倡捐勸輸人人踴躍支用出入胥吏莫敢奸焉而且董事諸君耆碩則沈九時姚丹霞殫厥心力捐助不惜重貲文學則周雯談紹曾沈作梓姚景賢僉竭蹶趨事所謂上有實心任事之賢侯下有同心輔弼之良士宜其無冗費而工無虛飾秋毫不假乎公帑厥功倍勝於前人也與於稽其用千有五百計工萬餘計日一載有奇其規模崇聖祠鼎建三進制度弘廓櫺星兩廡修廢舉墜大成殿飛簷鬪角金碧嶙峋神主廚座煥然

一新他如明倫堂敬一亭博文約禮兩齋次第整頓文昌祠重開門第宮以內蘭堵玉砌宮以外墻垣萬仞鳩工庀材隨時告竣而碑記未勒似有遺憾蓋因甲寅八月錢侯特調仁和饒侯以江右名進士來蒞茲土輒以其事爲惓惓然則前有杜父後有召母豈惟吾庠之慶抑亦兩浙之光升也忝視學粵西不獲與茲盛美猶幸於郵筒中見同學諸君乞言勒石得以備聞其詳顧余雖不文而曠事希再能不臚陳以爲後之從事斯文者勸乎是爲記

重建大成殿碑

蔡賡颺雲士

國家承重熙累洽之後凡所以陶淑斯民之心性作新天下之人材章程明密品式周備有司牧之責者欲別求更化善治之術固毫末不能有加則惟奉行成法競競焉舉廢修壞以不墜教戒斯可矣夫廢者之宜舉壞者之宜修孰有過於庠序學校者乎顧近今梵宇琳宮斤斧之聲不絕於耳至庠序學校之重官與民任其頽廢未嘗過而問焉謂非舍本而務其末歟吾邑學宮自乾隆五

十六年重修迄今又五十餘載大成殿日就傾圮餘亦坍塌剝落陳丹暗粉無復舊觀清溪地瘠民貧又連歲告歉版築之興有志未逮每春秋二仲邑侯蒞祭偶值風雨則霑服失容草草將事凡更數任迄未有議及興修者歲在癸卯北平仲侯來公履任之次年政成多暇朔望謁聖仰瞻榱桷心不遑安爰與司訓王君督同邑之紳士妥議建修乃審量日力庀材鳩工梁棟之朽者更之甌甑之毀者易之垣墉之摧圮金碧之黯淡者修除而黝堊之由大成殿至東西兩廡儀門櫺星門宮牆崇聖祠名宦鄉賢等祠並學署大門一律修整以次完葺經始於仲秋五閱月而工畢官長衆紳士恭迎先聖神主陞殿復位行釋菜禮敬告成事簫管備舉廣樂四陳濟濟焉踟蹰焉登降揖讓禮無違者信乎其知本而近古矣蓋事非共濟之難而倡率爲難侯能重道崇儒以飭吏治比調任去邑猶慨捐清俸俾蒞厥功惠心所孚始終靡懈宜闔邑士民聞風興起輸財効力奔走偕來其開物成務如此之敏以速也府屬遠離桑梓未克襄臂指

德清縣新志

卷十  
藝文

五

之勞里中人來備述巔末竊歎賢父母深識爲政之本而喜在事諸君之相與以有成也於是乎書

重建德清縣儒學記

俞 樾曲園

吾邑之有學創建於宋大中祥符三年本在縣治之南明正統六年始移於今所嗣後屢圮屢修具詳邑乘可無述焉咸豐之季吾邑再陷於賊同治三年官軍收復縣城城郭荆榛市廩煨燼而學宮亦全燬矣邑士大夫馮君壽鏡丁君毓琨胡君汝聯蔡君兆騏丁君覺源沈君駿飛合謀修復鳩工庀材楨揭從事邑侯旌德劉公蘭敏言於方伯發洋錢二千以濟工用乃重建大成殿並東西兩廡於殿東北隅建崇聖祠又於東建名宦祠於西建鄉賢祠大門二門及櫺星門次第落成而經費已竭明倫堂及兩博士齋均未之建至光緒二十二年武昌黃公大華來宰吾邑慨然曰學以明倫也堂之不建倫何以明乃捐廉俸銀洋錢三百以爲之倡邑紳前署奉天東邊道徐君本衡捐錢如其數邑之人

士聞是舉也咸大用勸集貲至三千四百千有奇又得徐君士駿施君涵高君振垣沈君汝楷戴君湘徐君肇基許君德修沈君光裕董理其事閱實其功都凡明倫堂五間正副兩博士齋各十間經始於光緒二十三年八月至二十四年歲在戊戌而一律告成是歲也吾孫陞雲適以第三人及第於是邑之人咸喜曰吾邑進士入國朝來一甲一名者三人一甲二名者亦二人而一甲三名未有其人今學宮之工畢而三鼎甲全庸非其驗歟余曰不然科名雖出於學校而學校固不獨以科名重吾郡屬縣凡七而自烏程而歸安外吾邑爲盛不特科名然也卽論學術亦然蓋天目之水龍飛鳳舞以走臨安必先經由吾邑鍾其靈秀聚爲英華故歷代以來人材輩出國朝二百餘年尤稱極盛先達諸公其登巖廊位卿貳者皆卓然爲時名人次之亦能以政事文學自見一二老師宿儒又能原本經史發爲文章垂爲著述以紹續儒先嘉惠來者吾邑大家舊推四姓曰徐曰胡曰談曰蔡而沈而許亦右族也稽其譜牒咸有傳人余生

也晚未獲親炙然自童穉以來耳目所及如三江三戚三戴並以兄弟競爽推重一時亦吾邑之美談也方今朝廷力求振興尤以人材爲重士生其時宜如何爭自磨厲以副上求哉夫取士之道雖或不同而原本經史以爲之根柢則固萬變而不離其宗者也吾儕幸學宮之落成入其門拜其堂下肅然而觀穆然而思思鄉先達之流風餘韻父以勉其子兄以勉其弟則學術盛而科名亦盛上以副朝廷敬教勸學之心下以副賢有司化民成俗之意與邑士大夫辛勤集事之苦心必有在矣余衰且老猶惓惓然爲吾桑梓之邦望也

學師曹公祀田記

沈毓洙

故明司訓曹公世慶由滇南明經佐鐸清溪卒於官天末萬里而遙不能歸葬葬於本邑徐奎山麓公生前置有一黃阡圩田九畝九分七釐六毫歿卽立爲祀產官役歲供春冬兩祭由來舊矣近因收租寫遠不便適有鄉人以近城之產互相移易而數多寡不符致滋物議己丑之夏長白興父師德下車之始百

廢具舉廉知其事慨然曰祀田相沿已久卽產有肥磽儘收儘辦何可動搖鄉人聞之悔過歸原請銀兌照幸蒙批允寬宥公曰是不可不垂戒以儆其後爰命生監之明通者紀其事勒碑於明倫堂俾曹公祀享歷諸久遠而不朽公之此舉可謂寬嚴並濟仁義兼盡者矣謹不愧固陋援筆而爲之記批曰己命改戶曰儒學祀產所有田畝號圩例得刻於碑末 一黃圩夜字第二百三十一號田四分二釐五毫 又二百三十四號田一畝零八釐 又二百三十七號田七分八釐 又二百四十九號田一畝三分五釐 又三百零一號田二分六釐九毫 又三百零四號田一畝一分三釐 又三百零七號田四畝零一釐五毫 又五百七十一號田七分五釐四毫

清溪書院記

徐以升

德邑距省郡百里而近羣峯翠聳自天目發源一水中通苕霅溪山明秀擅扶輿清淑之氣風物阜安人文炳蔚自有明以來以理學氣節文章風雅見於志

德清縣新志

卷十  
藝文

七

乘者班班可考迨本朝而科第人材之盛幾甲於三吳鉅公名儒輩出勳猷著述各輝映當代固山川間氣所鍾亦由國家涵濡培養之厚也顧義塾久廢都講不立蕪荒讀書之巖煙寒教授之市後來之秀雖年盛至美頗有人師難得之歎邑侯保昌季公以名進士來蒞茲土甫下車卽慨然思所以振興之相度形勝以學宮之巽流久闕乃董工開濬首復其故遂卽學舍之東偏舊所爲會饌堂者闢清溪書院聚生徒其中延師主之日有程月有課侯復手其文之甲乙以加獎勵又念膏火之不繼脩脯之不充無以爲經久計也捐金買田以贍學者因以爲樂輸者之倡蓋創建未半載而侯之割清俸捐養廉者已數百金焉侯固曰吾亦唯期諸生留心實學經明行脩彬彬郁郁爲國家儲有用之才爲此邦成雅化之俗至於廩給之加贍屋舍之加廣書籍器用之備具吾固將次第以舉唯盡吾力之克至而已且事屬草創其恢廓而增美之則前規後隨又不能無深望於後來者之踵事也於是邑人士僉曰篤哉我侯之教士也不

可無文以紀之因相與屬余爲記以鐫諸石余惟三代造士之法莫備於成周其所以養成人材皆少長於黨遂之間而熟習乎庠序之數長育成就者殆非一日有州長以會其禮射有鄉大夫以察其行藝齒位之序既有黨正孝弟之書又有族師而朝夕之所漸摩尤殷殷於鄉學之左右塾故其時無不學之民無不學之地耳濡目染優游涵冰人心正而學術醇士習端而賢材盛古聖人所以化民成俗而重土著之教者莫要於此按學記云家有塾鄭註古者仕焉而已者歸教於閭里朝夕坐於門門側之室謂之塾孔疏云周禮百里之內二十五家爲閭同共一巷巷首有門門邊有塾謂民在家之時朝夕出入恆受教於塾今值我國家文德覃敷直省廣建書院而一郡一縣亦多有書院之設其卽古人左右塾之遺制歟宜我侯之勤勤於此也邑之諸英髦讀書其中括羽鏃礪勿荒以嬉有造有德風氣日上將見理學氣節文章風雅鄉先生之流風遺緒於斯復覲又不徒區區工帖括繡鞶輓以弋獲科第爲能事庶無負賢侯

德清縣新志

卷十  
藝文

八

作養之意也夫是爲記

仙潭書院記

俞樾

德清縣東北四十五里有新市鎮焉晉永嘉中自縣東南之陸市來徙於此故有新市之名宋元以來人文輩出如陳聲伯之風節唐灝儒之理學皆足爲桑梓增重後起之秀亦蔚然可觀凡吾邑應試之士新市一鎮率居其半焉咸豐之季東南各行省通都大邑皆陷於匪而新市獨完嗣是休養生息日益饒衍商賈駢坌士女頡頏背窳就隆罔不脗飾而自永嘉以來千數百年竟無一人興學設館建立講堂俾秀艾之士得以諷誦其中斯非其大闕歟鎮人鍾桂谿廣文余同入學之老友也富而好義每有義舉悉以自任念縣城雖有清溪書院而鎮距城遠握素懷鉛就試非便乃於鎮之東南隅購得黃氏廢地創建仙潭文社爲門塾三間爲講堂三間爲齋舍三間廊廡迴環庖湑悉具凡用制錢一千二百餘千卽議籌備經費爲山長束修生童膏火之費有志未逮而卒其

哲嗣聽泉司馬選青痾先志之未償惜斯舉之中輟捐錢二千緡以成之有俞石林州丞錫麒者與鍾氏有連且與聽泉同志捐錢一千緡以助之有別募集錢一千緡資費物足課事肇興易其名曰仙潭書院趙曲江司馬斯濬聞而募之以其故父理問君恩銘遺命助錢二千緡而聽泉又秉其故母沈淑人遺命以釵鑲衣服易錢五百千買程氏屋一區歲收其租佃入書院於是仙潭書院規制大備余感廣文君之有志竟成而又嘉聽泉之能成先志爲言於撫軍崧鎮青中丞每歲自中丞以下均按月行課與省中之書院等此外府外縣所無惟吾郡菱湖鎮之龍湖書院則然余援以爲請中丞從焉士林頗以爲榮於是聽泉言於余曰是不可以不記乃述本末記於石俾後人知鍾氏父子經始之勞與俞趙兩君贊助之力肄業是院者爭自磨勵以副國家教育人材之至意則豈獨一鎮之幸亦吾邑之光矣光緒二十六年庚子十月穀旦古黟汪瑞章鑄字

重脩察院記

王廷諫

甚哉邑令之難而爲今日之邑令尤難而爲清邑之邑令尤難之難清固夙稱腴壤人文甲於天下余嘗讀名公諸稿心切嚮往不意膺天子命承乏茲土余曰幸矣遂夙願矣詎始入境見其室廬荒廢田塍蕪萊且啼饑號寒者聲滿室也鵠面鳩形者踵相接也猶曰此無告之窮氓或然夫何身登仕籍名列膠庠者亦多北門之嘆交謫之苦嗟嗟何夙腴壤而凋敝至此及謁

先師廟棟折榱崩鞠爲茂草繼閱城郭樓無一椽僅存空址堊無半磚竟類詭垣至於城隍廟關聖殿廟貌雖存問其廟祝有人乎曰無有香火不缺於供乎曰不能以彼其人身無所棲相率遁去耳余聞之深爲太息寧有居是職官斯地視爲傳舍而漠不關心以至此乎遂勉力捐橐鳩工庀材首聖宮城郭則殿廡奕奕也崇墉言言也次暨廟殿則棟宇鏘鏘也輪輿煌煌也不第是也清邑環城皆河無不闕塞疏濬之則商賈不艱於負戴河上有大橋年深傾圮脩築

之則往來不苦於揭厲又不第是也縣治東有察院司向爲直指使而設今奉  
裁而名尙存竟成瓦礫過者不無故宮禾黍之悲余於漸次遞舉之餘力爲興  
建匝月落成是堂也可以慶賀拜祝可以送往迎來可以講明聖諭可以會文  
課藝得此而無所不備雖然夫當物力告匱之時而諸務遞創寧無有議其可  
緩者不知此皆治術之大端事之要務况所費甚繁除已屢捐薄俸外其餘悉  
衆樂助不敢攫取民脂亦不得巧生借端此余之可以自信而併可信諸人者  
故於司之成而備記之非以彰功冀後之宰是邑者勿視爲傳舍廢者脩墜者  
舉佐余之不逮而日益光斯厚幸矣是爲記

康熙二十五年歲次丙寅季夏吉日

### 重建德清縣署記

譚廷獻

郡縣吏長官必有舍非徒處優以養尊也蓋號令發施鄰於閭閻則觀聽不肅  
吏役趨走雜於閭閻則出入不謹而倉廩牢獄守令尤嚴而功令之所繫今古  
同之湖州治都會之西唐以來分縣德清吳羌餘不山水嘉勝不意咸豐十年

## 德清縣新志

卷十  
藝文

十

春二月有寇陷城墮於劫燹廬井盪然而官廨盡燼同治三年官軍克復黎庶  
重見令尹威儀百爲草創不得不假民居以治事十年以來大令怒焉局趣治  
所陳乞上官請資興造劉蘭敏華學烈汪榮諸令長官牘具在未許匠築物力  
蒼黃上下歎息逡巡久矣逮光緒初元賢有司支大夫恆椿來治斯邑憂前人  
之憂有誠以獲上以臨民慨乎官舍之久毀無由肅觀聽而謹出入於是濫陳  
大吏圖說詳明始得遂所請給巨帑庀工之日首捐廉俸士民歡躍百八十一  
間之堂舍並捕衙獄屋具焉二年八月迄三年六月不一載而落成土木之費  
有不足者扶義感召則邑縉紳鍾君丙熙沈君駿飛高君點籌資補闕而始終  
董理爲蔡君兆騏以賢遇賢斯無怠廢驗工堅實行省耳目不遠不獨公牘之  
詳備也重建以來德清科甲相輝映碑在人口閱二十餘年未有文字之紀述  
爰識本末以示來者表賢勞焉支大夫字壽伯丹徒人令嗣君潤彥浙江候補  
知縣勤求治術將以繼燼云

名宦鄉賢祠記續侯志

曾用

德清縣舊有二祠位廟學戟門之東西合祀者凡若干人惜旌別未愜大夫三山方君崇尙文教嘉靖四年聿新夫子廟宇博考郡典得有唐慶公澄迄國朝王公良臣凡九人悉表爲名宦其未登祀者如宋沈公畸吳公潛游公汶暨國朝張公審四人者節概文章迥出羣類俱表爲鄉賢若李沐黨附權奸排擊宗臣則議以輟祀白諸當道報可遂於戟門左右分揭二祠創製木主備書爵諡徙鄉賢於西字序名宦於賓席府志

重建忠義孝弟貞節祠記

童叶庚

德清山川靈淑代生忠義孝弟貞節其磊落軒天地踔絕冠古今者史乘不絕書摺紳先生或皆能道之然非世家巨族後有達人者亦有傳有不傳他如名不溢都鄙足不踰里巷間氣所鍾各行一是迨老死江鄉馨芬銷歇年代既遠竟有舉其姓氏而罔聞知者良堪浩嘆此邑之總祠之不可不建也國朝雍正

德清縣新志

卷十  
藝文

十一

四年天子憫之詔各省督撫飭郡邑建造歷代忠義孝弟貞節總祠歸入通祀有司春秋致祭潛德幽光鬱無不發煌煌鉅典昭茲來許矣德邑儒學之西偏向有忠義孝弟貞節總祠雖規模湫溢時溘時修然祀事孔明歷有年所咸豐庚申辛酉間因匪擾境城池淪陷祠並燬焉同治三年大軍克復昔之祠基瓦礫堆積漸成高阜不僅鞠爲茂草而已邑人許刺史士奇一再經過愀然興感擬思重建苦歛無可籌會省中大吏設立捐局舉辦善後刺史時廁幕僚商之同邑戚比部人銑沈廣文閔崐徐明經士駿等聯名呈請方伯德公准於德清絲捐內提支若干緡諸紳聞之喜曰役可興也遂鳩材召匠諏日理基卽延徐君士駿許君士英施君涵權會護作起於光緒癸未十二月閱甲申九月而始潰于成計重建祠祔三楹堂前後各三楹前楹奉妥歷代忠義孝弟栗主後楹奉妥歷代貞節婦女栗主秩然不紊其崇較舊制尋而增修更加於崇廣視脩之數而倍其半榱椽桷楹不愆於素瓴甃液構材美工巧唐塗垣墉百廢具舉

豆籩之屬亦皆備焉且夫世之人於己之家廟往往絀於經費而不建建而不能脩燬而不能復興者亦指不勝屈茲許刺史能籌畫重建合邑總祠俾忠義孝弟貞節幾湮而不彰者幽無不闡亦佚無不摻用以彰國恩而隆肝蠻可謂賢矣而又喜都人士相助爲理克底於成余適承乏斯土躬預祀典請爲之記不敢以不文辭爰縷述祠之緣起及重建經始落成歲月泐諸珉俾來者有考焉

重建德清縣富甯橋記

錢學洙

德邑橋梁見於志者凡六十有四其在縣治前跨北流水者曰通濟橋今但呼縣橋者稱首焉夏令曰九月除道十月成梁孟夫子曰歲十一月徒杠成十二月輿梁成蓋蓄洩資川澤往來資橋梁二者常因焉則以時脩舉俾民不病涉者非責司牧而責誰歟雍正八年四月余奉簡命承乏茲邑自省城逶迤而來由是橋躋公堂石半頽壞因甫下車未遑脩舉既而都人士紛紛請曰此橋爲

德清縣新志

卷十  
藝文

十二

輿騎出入之所慶賀朔望又爲里老聚候之地自明正統間本縣王公完葺以後垂三百餘年日就傾圮脩廢舉墜殆不可緩矣余曰唯唯邑之紳士商民靡不踴躍爭先輸助余亦捐俸助之越辛亥而工竣紳士請紀於余余因滋懼焉物之興廢無常新之難毀之亦易往者無知射利構屋其上前令趙公拆去後漸構蓆棚譚令又力爲廓清今余惓惓於斯橋而大爲之禁亦猶二尹志也橋名易以富甯余得之夢中老人之口際此盛世隆平我邑殆旣富而且甯歟并誌

重脩阜安橋記

廖宗元

縣治南屹然跨餘不溪有橋曰阜安建於唐天寶中舊編以木易石於宋代有補葺至國朝經馮張李周前尹先後重脩近爲暴漲水衝盪突肆因勢漸傾阨前仲尹捐貲議脩復事未就移篆去余以己酉秋蒞斯土鄉飲讀法與邑紳晉接詢邑興廢多以脩橋爲先務時值大水比年不登民困未蘇姑緩其事今庚

戊春欲益甚邑之紳耆乃毅然爲已任謀既成告余余聞之喜且自愧余乏治邑才任數月百務粗就理遽興斯役豈果民說忘勞耶抑邑之人好善性成其素所觀感者然也吁可嘉也因捐俸助成之工始於夏六月卽於是冬十二月告成費鉅功倍又何速也公餘臨覽橋綿亘二十餘丈廣倍尋翼以欄楯護以檣杙砢然堅固可垂久遠憑欄凝眺下瞰清流水石掩映仰挹吳羌山色蒼翠在眼連屬於街衢閭閻車徒絡繹衆庶娛樂熙熙然往來者履如坦途利濟之功猗歟偉矣阜安之名於茲尤信按是橋始名天寶繼名餘不後乃因蘇文忠公風俗阜安一語更今名屢脩無以易有守土之責者一登斯橋所以物阜民安躋之於仁壽之宇者當何如慙然動念而邑之人又當何如振興鼓舞以無負此命名之意耶則斯橋之成有舉莫廢更歷千萬禩而阜安無以易也是所願與後之人共勉之也

覺源沈金鑑碑立觀音堂神廚左側

道光三十年歲次庚戌嘉平月吉旦董事紳耆黃際昌林芳戴師節徐文炳蔡彤章蔡鴻勳江毓蓀程維鈺王之創許邦傑丁

重建大麻望仙橋記

程元章

王政之大務在利民昔鄭子產乘輿濟人子輿氏以爲不知爲政蓋卽濟人一事而徒枉輿梁有所當務焉余曾任總藩於僚屬謁見輒以此諄勉迨陞撫上江未及兩載復荷殊恩節制全浙入境至德清之麻溪溪故有橋曰望仙因年久坍塌邑令錢學洙詳請前部院撥項興脩經湖郡守唐紹祖總理規制高廣工料堅固視昔有加予目擊焉旣下車錢令以橋工告竣請爲之記予按是橋也地屬官塘爲漕艘出入所必經吳越行旅往來之要道其創建之由亦莫可考舊記自明成化三年里人沈本源倡捐脩葺歷今又二百六十餘載石旣傾圮梁亦頽壞舟楫有觸石之虞商旅有褰裳之慮守茲土者宜亟爲整葺方稱厥職乃錢令請動公項銀一千六十兩有奇不期月而成此巨工無俟人人而濟而人無不濟是舉其實獲我心矣方今聖天子宵衣旰食軫念元元凡在臣工勤勞翼贊庶績咸熙而百廢俱興利民之務又豈獨橋梁道路間乎爰誌其

事並與爲政者共勗之

重建白雲橋記

俞樾

苕溪之水出天目而萃臨安必經由於吾邑邑之東南有白雲橋焉其要區也舊名雲塘亦名步雲又改爲白雲不知始建於何年一脩於明萬曆三十六年知府陳公再脩於國朝雍正八年知縣錢公有李敏達公碑記詳言之矣自雍正至今又一百七十餘年歲月緜邈兼經兵燹而是橋又圯由其地者水陸皆阻邑人聚謀議重建之馮君久成費君梅春倡始勸募有沈氏婦曰妙蓮巾幗好義亦贊成焉工鉅費多尙苦不給又有施君涵徐君肇基徐君士駿戴君湘丁君毓瑛沈君光裕廣爲勸合以竟厥功經始於光緒二十七年九月至二十九年三月告成都凡石料匠工用錢六千四百餘千椿木石灰及其餘雜用一千六百餘千共用錢八千餘千脩廣高下一如其舊直欄橫檻罔不胥飾由是高桅巨扁容與乎其下躡履擔簦逍遙乎其上咸頌曰美哉斯橋也舊史氏俞

德清縣新志

卷十  
藝文

十四

樾樂觀厥成爰述本末刻於橋石用告來者

重建德清城隍廟碑

俞樾

城隍之祀古矣或謂始於八蜡之坊與水庸然孔穎達謂坊以畜水障水庸以受水泄水則是田間溝塍非城隍也城隍之祀其始於春秋宋鄭之祭四墉乎其神乃地祇而非人鬼然古者以句龍社王肅之徒並謂社卽所以祀句龍則城隍之神亦可以人爲之吳越時曾奏請以唐右衛將軍總管龐玉爲城隍神封崇福侯殆亦神道設教之微意乎吾邑城隍神舊碑所載無姓名相傳爲勞公諱鉞字廷器江西德化縣人則明成化間守湖郡者也故老傳述或非無因而儒者難言之然縣城築於宋末明初止存土郭嘉靖間又重築之周七百七十三丈高二丈有奇因港汊而爲池倚岡隴以爲塹苕溪之水直貫城中夾溪而居者煙火萬家山川雄秀人物殷昌則宜有神以主之此固國家秩祀之所必及而士民報賽之所不容已者也考之志乘城隍廟在儒學之左宋紹興中

建國朝康熙雍正嘉慶間屢次脩葺有林園之勝神歌其祀民受其賜洪軍之亂焚燬無遺惟頭門巋然獨存克復之後許秉鈞請於邑侯釀於所屬各區莊創建二堂又由邑士大夫廣爲勸募歷二十餘稔始得復其舊觀門廡崇閣堂宇深邃廊榭繚曲花木幽深若節春秋官是土者率循典章陳設牲醴一邑之民頒賦而集厥角於庭瞻其棟楹謁其帷帟莫不肅然而致敬焉是足以奉神之靈而錫吾民之福矣竊惟國家秩祀之禮與賢有司成民而致力於神之義斯舉也亦脩廢舉墜之大者也作而不紀後世爰述因紀其事而系以銘銘曰吾邑之建始自有唐垂二千年人物阜昌是宜有神主此一方昔遘兵亂今樂時康祛除災疢調順雨暘疇非神賜而敢忽忘乃庀鳩材材美工良復其舊觀築此新堂有門有庭有室有房神之格思錫福降祥永永年代惠我無疆

光緒十五年

年己丑歲仲春里人朱勳鐫字

### 重修餘不亭侯廟記

徐秉愿

餘不溪貫長橋而下有二廟對峙焉東祀戴侯西祀晉贈車騎將軍開府儀同三司孔公諱愉歲以春秋二仲月致祭按晉書公字敬康山陰人以討華軼功封餘不亭侯公嘗經行餘不溪見籠龜於路者買而放之中流龜左顧者數四及鑄侯印印龜左顧三鑄如初印工以告乃悟遂佩焉曾任吳興太守墓卽在縣西南城山之陽有古木數株堅如鐵石相傳龜銜窠樹種於此號爲龜銜樹載郡邑志神靈赫奕爲四境保障國初紳士延紫極觀道人章子林沈嵩年來主香火携有唐中嶽道人沈法謙所鑄銅鐘驅邪法印嘗聞故老言印能驅虐患者佩之卽瘳遺失已久嘉慶二年四月有嘉慶老嫗手持鐘印匍伏殿庭剪紙焚帛敬具牲醴向守廟者告曰鐘印有我家已四十餘年矣不知所自來今民夫夢神命送歸德清餘不亭侯處夫遠出未歸故潔誠而來冀神之恕宥也一時爭驚爲異廟久未脩日就圯剝同里蔡君郊文姚君慶占首創興脩同志者皆醵金爲助鳩工集事垂霽重簷焚燎交接地則黜之墻則聖之頓還舊觀

歷三月而歲事乃奉侯像設出巡百役執事踴躍爭先歡洽衢巷然後返乎殿庭以妥以宅邦之人咸值儻然胸轉以游莫不感神之貺而美蔡姚二君相成之力也予惟中嶽道人流傳之鐘印久已化作彩雲矣乃一旦珠還璧返是必道人之慧業爲侯所欽重故呵護長留閱時已久輾轉復歸於廟也班固之言如道家者流清虛以自守卑弱以自持予念守是廟者深契圭旨以繼中嶽之辦香庶幾無形之道教藉有形之法物傳貽無極矣是爲記

重建保濟顯佑侯廟碑

錢學洙

侯諱繼元字承祖邑之焦山人生於宋嘉定間敦孝弟務正直爲鄉隣重延佑二年以拯溺委身浮尸溯流里人懷其德感其異遂塑像立廟崇奉溪濱威靈大著元封顯佑侯湖州路總管明嘉靖間倭寇臨城邑人震恐遙望山巔旗幟浮空咸有戴字寇遂驚逸邑有險塘捍上流諸水每霖雨輒若泛溢萬歷戊申洪波驟至侯現身若排決狀水得平今雍正四年水決塘堤遐邇居民夜見火

德清縣新志

卷十  
藝文

十六

光神力陰攝萬頃民田兩邑漕艘咸賴保全前令倪倌因士民之請詳憲請封適調餘杭學洙奉檄來令茲士謁廟時見規模卑隘因倡捐改作衆志感孚踴躍樂輸鳩工庀材羣萃輻湊本年八月奉旨加封保濟顯佑侯春秋致祭欽遵製造神牌恭送入廟而廟工適竣惟侯之功德足以感動乎人心是以羣情鼓舞俾斯廟速成爲德邑保障焉是爲記

侯志略同

重建永靈東廟記

俞樾

德清縣新市鎮故有永靈廟考之縣志神姓朱氏諱泗父煦三國時朱然之弟晉咸甯中伐吳煦與焉妻從行至鎮而產子是爲神神博通書史膂力過人永昌元年死王敦之難泰甯二年封鎮國大將軍立廟於鎮宋紹興五年賜額曰永靈廟廟故在鎮西偏宋元佑初鎮東之人呂走祀不便復建廟於東偏規制閎麗視西有加國朝咸豐間毀於賊同治三年賊與官軍相持見空中若有神燈旌旗蔽野鉦鼓殷天賊遂驚走蓋神助也於是里人錢增重塑神像權奉安

於戴侯祠是年冬陳汾源姚藻等倡議釀貲先建廟右之集禧堂以居神六年春方議重建大堂神忽降而言曰視西廟崇二尺以壯青龍形勢爲一方保障鎮人且喜且懼鳩工庀材奔走從事逾年而大門以至堂皇次第落成徵文於余以紀其事余考三國吳志朱然本姓施爲朱治姊子治初無子以然爲嗣故從朱姓而煦無聞焉殆史失其傳乎然爲丹陽郡故鄣人故鄣與安吉接壤而然又嘗爲餘姚長山陰令則其弟或從行經由茲地而生子亦事理所宜有者朱氏世爲吳將甚見委任當咸甯時吳猶未亡煦以勳戚子弟安得反從晉伐吳卽從伐吳亦不能至此縣志所傳疑失實也廟舊有宋元符二年碑記稱神爲鳳陽府人鳳陽府自明始置安得見於宋碑其僞託不待辯惟言神生於施家巷以吳志徵之朱然本施氏子至五鳳中然之子績上表還爲施氏然則施家巷爲神之故蹟無疑矣余惟神之靈爽至今不替而深惜正史之無徵惟此一書合於正史故表而出之以傳信於後庶後之人益敬事神而被神賜於無

窮也 同治十一年秋七月立里人孫濬鉞楚南周濔書

德清重建留嬰堂記

俞 樾

夫幼而無父王者所矜民吾同胞仁人之志雖康成註禮偶遺養幼之文而管子治齊已著掌孤之令梁普通之世孤獨開園宋濬祐之年慈幼置局所以示少者懷之之意推父兮生我之恩使不獨子其子而親其親乃無不樂其樂而利其利我國家重仁襲義執冲含和廣保赤之仁茂珍黃之德蠓飛蠕動共拜生成里扑塗歡不遺幼稚固已澤流萌蘖恩逮蝼蟻吾邑於雍正甲寅始建留嬰堂時知縣事者錢公學洙實爲之倡大輅權輿檀弓物始錢少青蚨之積米無赤鹿之儲飯哺郟公得全已寡湮流李善所活無多邑諸生丁君覺源戴君師節等憫此嬰倪籌其久遠而又仁和諸生勞君本榮分陶白之饒捨麻青之積始因舊構重拓新規經始於道光戊寅季夏閱五月而堂落成至己酉歲廖公宗元來治吾邑得因經費之未充深慮規模之或替重加董勸以惠萌生蓋

賢令尹行不忍人之心士大夫盡汎愛衆之道其於斯堂也雖制度未宏而經營已瘁矣今夫尸鳩在棘君子法其均平童馬不馳聖人寓其慈愛唯彼赤子孰非蒼生或遇災年或遭家難男錢女布都無稱貸之門假母支婆孰任託孤之責風痲 枕冷牀單貌媚炳而可憐語謔謔而莫辨斯已孤桐已死苦竹難長又况中路嬰兒呱呱而泣入井孺子貿貿然來苟有人心其能膜視乎若夫寅后稷於寒冰之上棄於菟于雲夢之中此聖哲之奇蹤非尋常所習見然而畱枚臯於吳下竟擅文章收陸羽於竟陵遂開詩派葑菲可採芝草無根此一舉也固由惻隱之良或亦樂育之助焉嗟乎才不才各言其子誰非父憐母惜之身幼吾幼以及於人各予飽食煖衣之樂從此韶年卯日永絕啼號竹馬鳩車同安嬉戲上以盡鞠人之責下以全桐子之生其於我國家子惠黎元之治或亦有裨與予久違故里喜善政之有成欲勒貞珉懼空言之無補敬述良有司字民之實政諸君子勸善之公心以著於碑以垂於後與餽與乳務爲九

德清縣新志

卷十  
藝文

十八

重廣晏晏之仁引養引恬行見四境享熙熙之福

集 齊 萌

德清縣新市鎮育嬰堂記

唐煦春

世運無古今通塞而善人之生終不絕於其間人無知愚賢不肖而爲善之機具於生初而各足有以感之則此心油然而生而同歸於善於新市育嬰堂之建而深有慨焉新市隸德清縣治爲江浙往來孔道居民商賈錯處其間繁富冠一邑顧湖州府屬七邑有溺女惡習德清舊染未滌以故縣治設留嬰堂官紳共蒞其事鄉鎮則未之及也同治甲戌之秋 煦春權縣事下車伊始卹卹未遑適郡司馬胥公暨郡紳姚鑑邵桂生二君奉檄來勸保嬰事隨歷各鄉至新市與在鎮諸紳商建育嬰之堂謂鎮舊有公所以艱於費中毀保嬰事分任各鄉無所統一議建堂誠便而憚集資之鉅 煦春以事無創始則莫觀厥成乃捐廉二百金爲倡姚邵二君及在鎮諸紳繼之共得千餘金卜築於次年之春其地爲南寺面游家潭通衢四達爲堂三楹堂後之室各三旁列廂屋爲庖福之

所繚以周垣供用器物悉具經久所需則由紳勸本鎮集貲以垂久遠而育嬰之事備矣光緒元年四月吉日堂落成乃進在事諸君子於堂揖而謝之曰於戲忍心害理之事至溺嬰而尚可問乎以不佞之爲邑長於斯也思有以導民於善乃令呱呱者日就水濱而莫之卹其又何以自問乎今諸君子不憚財之殫心之瘁力之痛而輔不佞於不逮焉則信乎善人之生與善機之觸發充盈洋溢而維世運於不敝者也是役也創其議者胥公集其成者蔡兆騏胡汝聯蔡桂榮孫敬承諸君子共有力焉例得書名刻石其出資諸紳另列芳名以爲爲善者勸

德清縣義倉記

榮祿大夫少保戶部尙書兼武英殿大學士知制誥國史總裁永嘉黃淮撰  
中憲大夫浙江等處提刑按察使司副使王預書并篆額

國家惠養斯民以固邦本惟恐閭閻扼於饑饉不得以遂其心上煩聖慮宵旰

靡甯重念太祖高皇帝舊設預備倉廩歲久馴致廢弛臣受以璽書條畫事宜分詣各道以經理之仍命藩司重臣之廉敏者以爲之佐刑部署郎中事員外郎劉廣衡承命往浙江偕右布政使方廷玉按察使副事王預協修預備之布按行至湖集郡守趙登暨僚屬同知劉禎知縣王敬等宣揚德意仍命區里之長及鄉之耆民羣聚於庭諄切訓飭益加詳焉邑中富美之家聆玉音感激奮勵願出穀輸於官未決旬得穀六千八百二十石敕使同藩憲憲其民之效義也勞之以酒果榮之以贈綵卽日具名以聞旣而鳩工庀材備倉四十三楹以備儲蓄欽遵敕音選忠厚公正耆民及殷富淳良之家嚴慎守護兼出納之數府委通判賀泰縣丞崔時雍總其政申明戒約委曲詳備大要以絕私無擾於本里社細民皆惟忻感悅仰戴聖恩生成之賜也郡縣樂其事之有成徵文爲記勒石以垂示永久洪惟成周縣都皆有委積以備凶荒自漢以來迭置常平社倉義倉大率皆効周法世殊事異更變不一皇上遠稽典籍近追祖宗

成法遣使巡修復舊政而觀之俾得便宜行事預期民受實惠綸綍煥頒而効義之民雲集響應倉廩充實賑貸於是仰給焉傳曰未有好仁而下不好義者此之謂也敕使同心協義允稱任使皇華輝赤遐邇共瞻郡邑官僚祇承唯謹不繁而事集防閑有方侵漁之弊消於法當得書其義民姓氏具列碑陰庶使觀者視効興起後克有繼也是爲記

### 勒石永禁藥魚碑

知縣張 爲給示勒石永禁事據紳士徐本衡施涵徐肇基徐士駿許德修沈光裕等稟稱竊德邑地處水鄉交冬以後鄉民皆以糠糶食餌紛投澆濱引魚萃聚旋將澆口用蘆蓆攔住復用巴豆敲碎煮水拋入澆中在水之物盡行斃浮水面俗謂之火燒河底其中魚類以及螺螄蝦蟹無一得生毒害物命莫此爲甚甚且四鄉皆有此惡習惟河墩橋北圩村爲最盛每年至臘月間無論大小各戶均以藥魚售錢爲度歲之資河中物命被毒害者不知幾千百萬叩請

給示勒石永禁等情到縣據此查北圩村四鄉等處向有毒魚惡習先經本縣訪聞正在示禁間據稟前情除批示外合行給示勒石永禁爲此示仰闔邑四鄉居民漁戶人等知悉爾等須知製藥毒魚殘害物命殊干天地之和會看北圩村等處慘遭風災煙戶蕩然不必顯言報施恰宜力加修省各勤正業何憂度歲之無資暗毒潛鱗卒爲戾氣之所釀自示以後務各愛惜生命勉爲良善倘敢故違一經覺察或被告發定即提案嚴究決不寬貸其各凜遵毋違特示署理湖州府德清縣正堂林 爲出示曉諭事照得德邑徵收新舊錢糧均遵減浮章程每兩折制錢二千二百二十五文又加糧捐錢三百文共收錢二千五百二十五文又春徵宣統二年份米石本縣亦遵減浮章程隨市作價業令酌定每石連二五耗並年外加價折收洋七元一角前經示諭在案茲據生員施清等稟請給示前來除批示外合行出示曉諭爲此仰闔邑糧戶人等一體遵照倘有書差地保人等敢有定價之外浮收分文准予指名稟縣以憑提究

其各遵照毋違切切特示  
宣統三年五月二十九日給

德清縣新志

卷十  
藝文

二十一

卷十勘誤表

頁	面	行	字	原	文	更	正	備	註
一	前	二	一	藝					
二	前	十一之二	十	浣					
四	前	四	四	又		院			
四	後	四	廿二至廿三	升也		而			
五	後	七	廿七	櫟		也			
六	前	五	廿四	二		擻			
十三	前	六	八至九	闌		三			
十八	前	四	五至六	闌					

是否闌之誤  
待查原碑  
原稿似脫兩字

德清縣新志卷十終